



AWIG-AWIG DESA ADAT
DESA AAN
KECAMATAN BANJARANGKAN KABUPATEN
DAERAH
TINGKAT II KLUNGKUNG
BALI

MURDHA CITTA

AUM – OM

Om Swastyastu, Om Awignam astu nama sidiham.

Putus pasebaning krama desa Aan gumawe punang awig-awig wesinurating lempiran
maka sipat siku-siku muang katitis wastu sida sidi saprayojana mami kabeh tan panguak
kata titining awig-awig iki, namostu jagaditaya.

SARGA I

ARAN LAN PALEMAHAN

Pawos 1

(1) Desa adat puniki mewasta : Desa Aan

(2) Wewidangan palemahan desa Aan puniki ngawengku tanah pekarangan desa saha
tegal, carik, druwen desa mewasta nyatur kadi ring sor :

1. Wates sisih wetan : Tukad Jinah
2. Wates sisih kidul : Toya Cantet
3. Wates sisih Kulon : Desa Adat Gunung Rata
4. Wates sisih lor : Bukit Pengukur Ukuran

(3) Desa Aan puniki papupulaning ayah krama desa, krama ngarep krama pengele,
krama kaputungan, sinanggeh krama desa, utawi krama patus agung.

(4) Risajeroning krama patus agung desa Aan malih kapah dados tigang banjar patus
madya sane ngawengku wawidangan apengeliman, luwirnia :

1. Krama Patus Banjar Peken
2. Krama Patus Banjar Pasek
3. Krama Patus Carik Dalem utawi Banjar Swelagiri

(5) Ring swang-swang Banjar Patus Madya malih kapah kadadosang makudang-kudang
Patus Alit, kadi ring sor :

1. Banjar Peken kapah kadi ring sor :
 - 1) Banjar Peken
 - 2) Banjar Selat
 - 3) Banjar Sala
 - 4) Banjar Pempatan
2. Krama Patus Banjar Pasek kapah kadi ring sor :
 - 1) Banjar Pasek
 - 2) Banjar Geria
 - 3) Banjar Gingsir
 - 4) Banjar Piyadnyan.
3. Krama Patus Banjar Swelagiri sane ngawengku wewidangan banjar Babakan Tapan lan carik dalem manggeh dados abanjar patus, inggih punika banjar Swelagiri.

SARGA II

PATITIS LAN PAMIKUKUH

Pawos 2

Desa Aan punika ngemanggehang pamikukuh desa makadi :

1. Pancasila
2. Tri Hita karana manut tatwaring buana agung
3. Undang-undang Dasar Republik Indonesia 1945 ring ajeng manut ring pasal 18

Pawos 3

Luwir patitis desa Aan puniki kasurat sekadi ring sor :

1. Mikukuhin kalih ngerajegang Sang Hyang Agama
2. Nginggilang tata perewertine magama
3. Ngerajegang kasukertan desa krama saha kasukertan pawengannia sekala lan niskala.

SARGA III

INDIK SUKERTA TATA KRAMA

Palet 1

Indik krama lan warga desa

Pawos 4

- (1) Sane kebawos warga desa Aan inggih punika : sahananing jatma sane jumenek ring pawidangan desa Aan saha setinut ring sahananing Awig-awig Desa lan sapemargin krama desa Aan.
- (2) Sane kabawos krama desa Aan inggih punika : kulawarga desa Aan, sane sampun merabian, ngamong karang, wiadin tan ngamong karang, nyungsung Kahyangan Desa, tur satinut ring daging Awig-awig Desa Aan.
- (3) Sejaba punika utawi satios ring kaucap ring ajeng kebawos tamiu.

Pawos 5

Krama desa Aan kepalih dados 3 sorohm luwire :

- (1) Krama ngarep : ngaran Krama desa sane ngamong karang ayahan desa
- (2) Krama kaputungan, ngamong karang luwire :
 1. Balu; balu luh lan balu muani/
 2. Sopian / nyapian palas masomah
 3. Tapukan, katinggal padem antuk yayah rena

Pawos 6

Kawit dados krama desa wenten tigang soroh, luwire :

- (1) Mawed jumenek ring desa Aan saking kaluhurania
- (2) Saking pangerawuh, saking desa tiosan jumenek ring desa Aan malarapan saking ngerereh pangupajiwa miwah sane tiosan, sangkaning patilar rahayu sakeng desania.
- (3) Melarapan antuk pawiwahan, prati sentana wit saking ayat 1, miwah ayat 2 ring ajeng

Pawos 7

Panemaya tedun makrama Desa :

(1) Tedun makrama Desa malarapan pawiwahan utawi ngerereh pangupa jiwa utawi patilar rahayu saking desa siwosan, katedunang makrama Desa risampune tedun makrama Banjar patus.

(2) Ngaranjing makrama Banjar patus kamargiang manut kawentenan pemargi kadi ring sor :

1. Yan nyelosin pemargi ayahan reramania padgatakal premangke, tan pawentenang panerangan
2. Siosing nyelosin ayahan, nyantor sangkepan penyepian, tur kadulurin antuk penerangan
3. Yan mawit saking pangerawuhan / utawi saking patilar rahayu saking desa siosan, mawaneng tigang sasih saking panunasnya, kadulurin antuk supeksa pailikitaan ring Prajuru Desa.

(3) Sang pacang tedun makrama Desa patut :

1. Sumanggup nyiwi Kahyangan Desa Aan.
2. Satinut ring Awig-awig, pasuara lan pamutus pakraman desa Aan.
3. Siwosan ring nyelosin ayah rerama keni pamopog penaub jinah, yening desane madruwe jinah kas.
4. Sang tedun madesa saking pangrawuh desa siosan, keni pamopog jinah kas desa, kalih pamopog wewangunan druwen desa, geng arta manut putusaning perareman desa

(4) Sane kapatut nyelosin ayah-ayahn krama desa :

1. Sentana lanang sane pinih duwur
2. Yan pada ubaya ring sasemetonnannya taler keluarga sentana lanang sane merabi pinih dumun, manut pasubayannia tur polih lalugrahan antuk Bendesa Adat
3. Nyelesin ayah krama syah lan sampun kaubayanin antuk sang kasalidihinin tur kasyahang antuk Bendesa Adat.

Pawos 8

Sehanan Warga Desa Keni ayah-ayahan pinaka darmaning warga desa luire :

- (1) Krama ngarep ngemargine ayah krama ngarep
- (2) Krama pangele ngemarginin ayah krama pangele
- (3) Krama keputungan ngmarginin ayah krama kaputungan
- (4) Warga kakuwuban utawi roban, utawi dandanan waris saking krama desa kadi ring
ayat 1, 2 lan 3 ring ajeng, sane sampun dehe truna (patut ngamiletin sekehe teruna
teruni) ngamargiang ayah reban utawi ayah teruna teruni

Pawos 9

Peson-peson kalih urunan ring krama desa wenten kadi ring sor :

- (1) Krama ngarep kalih krama pengele keni papeson-peson miwah peturunan
mamungkul
- (2) Krama kaputungan keni peson-peson kalih paturunan polih karingan manut
kawentenan pialang nyane tur nganutin daging pamutus parareman.
- (3) Banjar patus keni papesonan ring Desa manut wiguna, reh Banjar Patus inucap
maka tangan sukuning Desa.
- (4) Prade ring desa krama wenten pekaryan sane abot sane patut karomba kengin patut
karomba antuk sehananing krama desa banjar patus sami.
- (5) Prade wenten sinalih tunggil krama tan ngandutin kadi paswaraning bawos ring
ajeng, wenang krama desa inucap keni kemindanda manut perarem.
- (6) Asapunika taler ring sang mamurug paswaraning bawos lianan wenang katibakin
pamidanda

Pawos 10

- (1) Swadarmaning krama desa manut ayah-ayah krama patus desa lan banjar patus
luwire :

1. Dreda atuang ring desa

2. Manut tur setinut ring sedaging Awig-awig lan paswara manut peputusaning perarem
3. Tan maren ngutsahayang mangda desane prasida nyujur manut patitis
4. Lumaksana tur ngemarginin sahanan ayah-ayahan desa krama
5. Lumaksana tur ngemargiang sahanan kawenangan ayah patus/desa kalih ayah patus banjar
6. Lumaksana tur ngamargiang sahanan dedaunan prajuru desa kalih dedaunan pemerintah agunge.

Pawos 11

(2) Swadarmaning tamiu :

(1) Sane kabawos tamiu, sang majenek jumanek / mararepan ring desa Aan nistania awengi, upami mawit saking :

1. Malelungayan
2. Sasudian desa utawi pemerintah
3. Duduk-dudukan
4. Masundulang raga
5. Kadang warga utawi kewarga antuk sinalih tunggil krama
6. Ngarereh pangupajiwa miwah sane siwosan

(2) Swadarmania :

1. Tinut satinut ring sapamargin kerta lan tata kasukertin desa Aan
2. Nganutin tata cara bebanjaran sane ngawidangin

(3) Krama sane nampi tamiu patut atur supeksa, tur patut polih pengampok antuk prajuru desa

(4) Tamiu sane sampun merabian tur lanang wadon sareng jumenek magenah ring desa Aan jantos sasihan swenia patut katedunang mekrama desa, utawi kekening penaup pasewaka krama.

(5) Tamiu sasudian pemerintahan sane jumanak ring Desa Aan sareng rabi jantos sasinan keni sumbangan suka duka ring Banjar sane ngawedangin.

- (6) Yan ana wong saking dura desa utawi tamiu tan nganutin ucap ring ajeng utawi melaksana duskerti patut keni pemedanda utawi kadundung saking wawidangan Desa Aan.

Pawos 12

Pemargi krama ring Desa Aan manut pemargi sane sampun kemanggehang saking dresta nganutin kawentenang linggih krama kamenggehang wenten pepalihan pemargi sekadi munggah ring sor. Yan marep ring sang kapialang utawi manut wigunan krama kawentenang laluputan sekadi ring sor.

- (1) Sahanan krama desa keni pemargi lan ayah-ayahan kalih kakenan sekadi kasurat ring ajeng (Pawos 8, 9, 10).
- (2) Para ida-ida makadi san brahmana lan ksatria sane keangga sameton antuk ida idewa agung ring klungkung kapatut pamargine sekadi ring sor :
1. Kakenan patus suka duka, wewangunan desa patus, manut sekadi krama
 2. Saluiring rerabuan, papeson ida kabakta antuk krama siosan sapituduh prajuru
 3. Yan keni patus ajengan patut kalih pahan
 4. Rikala wenten pekaryan banjar patus lan desa krama wenang agegawan : caluk, parang, lan sakeluire
 5. Ring Desa Pura Ida tan kapipilang
 6. Satunggil wali utawi yadnya ring pura utawi pewangunan ring pura, prajuru desa, matur indik pemargin wali utawi yadnya, miwah pawangunane tur nunas aturan yadnya ring ida.
- (3) Laluputan-laluputan pamargi kawentenang mari ring :
1. Ida sang sulinggih / para pandita
 2. Para pemangku
 3. Para tri wangsa
 4. Sang / utawi krama sane seda angga banget lan sungkan tahunan
 5. Krama balu
 6. Krama ubuh / tapukan

(4) Laluputan inucap manut sekadi ring sor :

1. Ida Sang sulinggih pinaka purahitaning desa luput saluiring pemargi ayah-ayahan lan sehanan kekenan ring Desa. Para pandita siosan luput pemargi ayah-ayah
2. Para pemangku Desa luput pemargi ayah-ayah lan rerambuan miwah urunan yadnya.
3. Para tri wangsa yan kala pemargi ring patus, luput tategenan, pancalan, sinoman, sakewanten keni patus ajengan kekalih
4. Krama sane cedangga banget lan sungkan tahunan polih laluputan manut alangania
5. Krama balu polih laluputan manut kawentenannia
6. Krama ubuh (krama alit katinggal yayah renang) ngemarginin sepamargi krama tapukan.

Pawos 13

Patias utawi ulih-ulihan Krama Desa, krama banjar patus sekadi ring sor :

- (1) Wenang polih pesabayan utawi pengayoman saking prajuru Desa lan Krama Desa marep ring kasutrepian pawengania, padruwennia, Swakaryania utawi yadnyania. Kalih polih pitukung rarombayan saking krama desa rikala kakewehan, kaduhkitan, ketiban baya, karya abot utawi siosan manut patitis Desa.
- (2) Wenang kabawosin tur kapidabdabin olih prajuru Desa tur suka katiwakin pamutus sehananing wicarania
- (3) Wenang nyarengin pepareman Desa lan Banjar tur saha wenang mastikayang daging kaputusan papereman Desa kalih banjar.
- (4) Wenang nyudi prajuru kalih kalih kasudi dados prajuru.
- (5) Wenang polih papuangkidan lan laluputan manut kawentenannya kalih kaperluan ipun manut daging perarem, luwire ipun :
 1. Mapuankid sangkaning; sakit, matepetin, mayadnya, maleluasan utawi wenten karya perlu siosan

2. Nyada ngamademang ayah-ayahan manut suka jalarannia pacang nyada
3. Luput / polih laluputan sangkaning dados prajuru, kasudi antuk kawigunannia wiadin laluputan sangkaning kawastanin tiosan.

Pawos 14

Wusan dados krama Desa, sekadi ring sor :

(1) Wusan ngemarginin Krama Desa sekadi ring sor :

1. Seantukan padem, pogat ayah-ayah
2. Sangkaning kesah saking Desa Aan, kadulurin surat keterangan / ilikita saking Prajuru Desa
3. Sangkaning nyada, manut saka jalarannia
4. Sangkaning kawusanang / kajabut pipilnya, antuk ikrama Desa utawi Banjar wit saking banget iwang nyane

(2) Wusan kalih kawusanang antuk ikrama Desa panewmayannia padgakale utawi ngawit putusan perareman

(3) Sang wusan makrama Desa inucap tan kawenang polih pah-pahan druwen Desa utawi Banjar. Yadiastun wenten druwe marupa jinah Kas. Sajewaning sangkaning wenten krama suka, ikrama Desa utawi Banjar genah ipun pecak sareng mekrama

(4) Mewali malih makrtama Banjar utawi Desa :

1. Yan prade sang pecak usan mekrama Desa sangkaning rahayu, tan kepatutang keni panaub wewangunan druwe Desa wang inucap patut keni pakaad mara. Sakewanten yan wenten jinah Kas, patut ketaubin
2. Yan wenten prade sang pacang usan sangkaning tan rahayu utawi kacabut pilpilnia malarapan tan rahayu, mawali malih makrama Desa utawi Banjar. Wang inucap patut kakenin jinah pangular-alir manut putusing perareman tur nuku panaub jinah Kas druwe.

Palet 2

Indik Prajuru

Pawos 15

- (1) Desa adat puniki kaenterang antuk Prajuru ngaran Bendesa Adat Desa Aan, pinaka pengenter Desa Adat lan Krama Patus Agung
- (2) Krama Banjar Patus madya kaenterang olih Klian Pangliman. Gaguat pacang dados Prajuru Desa utawi Banjar patut majalaran sekadi ring sor :
 1. Mawiwit saking Krama Banjar lan Krama Desa Aan
 2. Mayusa sampun manut pacang ngemarginin dados prajuru (± 20 th)
 3. Keadegang malarapan antuk gilik paputusan panilihan kalih parareman Krama.
 4. Kadulurin antuk nunas piuning lan wara nugraha ring Kahyangan Desa Aan.
- (3) Krama Banjr Patus Alit olih Klian Banjar
- (4) Wewaneng wiyadin sengker dados Prajuru luire :
 1. Ngawit saking pangesahan Krama
 2. Mawaneng sajeroning limang warsa
 3. Yan sampun puput masengker limang pamargi Prajuru punika patut kaserahang ring krama tur mangda kawentenang sasudian anyar
 4. Sang pecak keangkat dados Prajuru malih kasudi manut perarem

Pawos 16

Bendesa kalih Prajuru sane nyanggra Desa, luire :

- (1) Bendesa Adat Desa Aan pada kasanggara antuk :
 1. Klian Pangliman pinaka juru wakilnia ring swang-swang Banjar Patus Madya utawi wawidangan Panglimanan
 2. Penyarikan punika juru surat makarya ilikita siwosan
 3. Patuugan / Sedahan, pinaka pangameng sahanan druwen Desa
 4. Jurua rah lan sinoman

- (2) Wawilangan panyanggrame manut manut abot dangan kawentenan pamargine. Palet-paletan pamargine nganutin Desa kala patra, utawi manut Paentengan wawirasan Prajuru utawi Klian Banjar
- (3) Sajeroning ngenterang kasukertan niskala, yadnya ring Kahyangan Desa utawi ngupakarsa kasucian. Kahyangan Desa lan sehanania kaenter olih Bendesa Pura Katuntun olih Ida Sang Sulinggih (Ida Pedanda), Pemangku Desa lan Parisada Hindu Dharma.
- (4) Bendesa Pura Kesanggara olih :
1. Klian-klian Desa ring swang-wang Pura Desa lan Klian-klian Pangempat
 2. Penyarikan
 3. Sedahan
 4. Juru arah
- (5) Klian Desa Pura, Bendesa Pura, Pura Pemangku patut mingsingihang pamongannia ring Kahyangan Desa saha patut kesanggara olih Prajuru istri, jero mangku istri.
- (6) 1. Bendesa Adat, Bendesa Pura : katuntun Ida Sang Sulinggih (Ida Pedanda), Kamanggehang pinaka Kerta Desa
3. Kerta Desa wenang matetiwak pamutus lan pamidanda marep ring Krama Desa ring wicara nganinin indik adat, susila lan Agama

Pawos 17

Swadarmaning Bendesa Adat, luire :

- (1) Swadarmaning Bendesa Adat, luire :
1. Ngenterang sahaning sapamargi daging kecap Awig-awig, pawsara lan putusan perareman desane
 2. Nuntun tur ngenterang Krama Desa rawuhing Warga Desa, ngupadi kasutreptian kasukertan Krama Desa manut patitis
 3. Mawosin kalih niwakin pamutus utawi maweh pawirasan arep wicara Wagra Desane manut patitis lan Awig-awig Desa
 4. Maka duta Desa pacang matemuang bawos ring sapisira ugi

5. Maka pengoreg Desa / pamenggala ritatkala mamikukuh Desa lan mikukuhang pamargi adat kalih Awig-awig Prade wenten wong duracara kalih pangerusak Desa siwosan

(2) Ritatkala ngenterang pemargi Desa Krama, I Bendesa Adat patut ngawentenang :

1. Wawirasan ring Prajuru Desa siwosan kalih prayogia sane taler ngawiwenangan Warga Desa mangda tan tungkas pamargi. Upami ring Perbekel, pekasah muah sane siwosan
2. Ngawrntenang partangan galah pengala Desa, mangde warga Desane polih galah galah paetangan pacang ngupadi pangupa jiwa, ngutsahayang pangaweruh kalih utsaha niri-niri sane siwosan

(3) Prajuru siwosan swadarmannia :

1. Pateh manut swadarmaning Bendesa, nganutin paetangan wawengkon pawidangania kalih wigunania
2. Penaka tangan suku kalih pangromba pangarep antuk I Bendesa.

(4) Prade I Prajuru iwang sesana utawi ngelinyokang druwe Desa keni kabuktiang kaiwangannya antuk para Kramane, punapi malih yan banget tempal ring daging Awig-awig Desa lan pasuara, patut keni pemitanda nikel ring pamidanda kaiwangan krama siwosan. Patut keni panaur kerugian arta brana marep ring Bajra utawi Desa manut daging parareman, saha kengin kerarianang dados prajuru

(5) I Prajuru sane kasisipang tan kengin ngenterang kalih nuntun perareman Krama duk punika. Prareman Kramane katuntuk antuk Prajuru tiosan, utawi kawentenang gagilhan panitia perareman.

Pawos 18

Patias Prajuru Desa, luire :

1. Saluiring kakenan rerambutan, kalih bebaktaan polih laluputan. Yan kakenan siosan utawi paturunan pateh ring Krama
2. Polih cenengan saluiring duman

3. Polih ulih-ulih siosan manut kawentenana pemargi manut putusing perareman Desa utawi Banjar
4. Miwah patias-patias sane siosan

Pawos 19

Ngentosin Prajuru, luire :

- (1) Prajuru Desa utawi Banjar kagentosin majalaran :
 1. Sampun puput waneng /sengker dados Prajuru utawi sampun panemaya
 2. Kelayonan sang Prajuru lampus utawi seda
 3. Tan prasida ngemargiang pemargi dados prajuru, sungkan tahunan utawi pialang abot sane tiwosan
 4. Pinunas ngeraga, tur sampun salugraha pinunasnya antuk Desa
 5. Keranyanang antuk Krama duwaning iwang pemargi
- (2) Ngentosing utawi ngerayanang Prajuru patut kararemin antuk Krama Desa sajeroning perareman Desa. Tur kawentenang pengelikitaan sane kesahang tur kesaksinin antuk Prajuru sane luhuran.

Palet Kaping 3

Indik Paruman

Pawos 20

- (1) Peparuman ring Desa Aan menikadi ring Desa Adat, Banjar Patus, Desa Pura, panemayania kadi ring sor :
 1. Paruman manut panemaya, luire :
 - a. Paruman Desa nyabran kesange
 - b. Paruman Banjar, manut pasubaya upami nyabran : Anggar Kasih, Buda Wage, Buda Kliwon utawi Tumpek
 2. Paruman padgata, manut kawentenana utawi manut Desa kalapatra

3. Paruman Prajuru kawentenang paling doh ayaban enem sasih, sakewanten yaning wenten pemargi buat, perareman punika padgatakala manut tetujonna kalih wiguna
 4. Sangkepan deha taruna, manut wiguna
- (2) Yan pesamuan / parareman sampun ngangge panemaya utawi patokan tan kawentenang pengarah. Yan paruman padgatakala patut ngemargiang arah-arrah.
- (3) Sangkepang wiyadin peparuman Desa / Banjar patut ngadudonan kadi mungguh ring sor :
1. Kadulurin pengarah prade padgatakala
 2. Macihna lumaksana risampune ketdunin antuk inganan atengah langkung saking krama sane patut ngamiletin.
 3. Prasida lumaksana risampune katedunin antuk inganan atengah langkung saking krama sane patut ngamiletin
 4. Sang pacang patum patut abusana adat akampuh, tur tan wenang agegawan
 5. Tan maren ngarcana Ida Bagawan Panyarikan maka sarana antuk banten sane Utamanyane ngarcana Ida Sang Hyang Widi Wasa mangda Ida asung wara nugraha, mangda sehanan daging tetojun parumane prasida kapti tur rahayu.
 6. Pangawit parum patut nyacak duman riwusnya sang kasep patut keni dadosan manut pararem.
 7. Panuitus babawosan kautsahayang malarapan gilik sadulur, pada arsa krama sani. Bilih tan prasida gilik sadulur, suara sesauran sane akehan kebawos patut kamargiang, nanging putusan punika taler mangda anut utawi tan banget lempas ring pamanut angunge. Minakadi Pancasila lan Undang-Undang Dasar 1945.
 8. Putusan perareme punika sinanggih pengawisara sane wenang nyelem putihang utawi maka panguger geguat tata pangenter Desa utawi Banjar manut drestane.
- (4) Prade wenten bebawos sane buat ;
1. Tan prasida molihang kaputusan utawi keraremin iprajuru patut ngalihang paruman ring bebawosan sane siwosan

2. Bebawos punika patut kewalihang matah utawi kewantunin ring peparuman sane ungkuran
3. Prade taler tan prasida puput olih pasubayan, tan prasida mangguh kadi kaptinin perareman. Wicara punika manggeh mekadi wicara abot ring desa, tur patut katunasang pamatut ring Pemerintah Agenge. Sane patut niwakin pamutus manut daging waicara inucap.

Pawos 21

(1) Sane patut kasiarang ring paruman Desa utawi Banjar :

1. Munjuk lungsuring Krama mekadi ayah-ayah
2. Saluir kalih sulur arta brana druwe
3. Indik pemargi sane wawu kapuputang utawi wewangunan
4. Rencana Prajuru Nganinin indik usaha kapungkur
5. Sehenan wicara saha pamutusnia

(2) Sehanan kakesiarang ring ajeng, keitenin saha katiwakin pamutus antuk paruman Krama sowang-sowang

(3) Pamutus parareman Desa utawi Banjar inucap patut lan lempas ring Awig-awig, tur sinanggeh perarem maka pemitegep Awig-awig Desa.

Pawos 22

(1) Sangkepan Prajuru magaguat kadi ring sir :

1. Kawentenang senistane enem (6) sasih apisan, nanging yaning bawos buat, kengin padgatakala manut wiguna
2. Katuntun antuk Klian Adat utawi Bendesa Adat
3. Kasarengin olih Prajuru Desa muang sehanan Klian Banjar

(2) Kawenangan peparuman Prajuru inggih punika, ngarincikang pangrencana, tata upaya sane patut keanggen ritatkala pacang ngelaksanayang sakeluring pamargi, usaha utawi rencana pawangunan ring Desa.

- (3) Pamutus sehanan rencana, punapi malih rencana sane pacang niwakin kenan-kenan utawi pamargi ring Krama, durung patut kelaksanayang sadurung kasungkemin tur kapikukuhang antuk paruman Desa Utawi Banjar manut dudonan.
- (4) Pamutus parareman Prajuru mawiwit saking pituduh sang miewang bhuana, utawi mawit saking pasuara Krama Desa sane rihinan.

Pawos 23

- (1) Sangkepan sekehe-sekehe kawentenang manut babuat kalih wigunania sewing-sewang
- (2) Penemayannia padgata kala
- (3) Nangken ngawentenang pesangkepan utawi pacang ngardi kaputusan sangkepan patut atur supeksa riyin ring I Prajuru Desa / Banjar prasida mangda tan lempas kadi patitis Awig-awig kalih pawos-pawos ring ajeng

Palet 4

Indik Kulkul

Pawos 24

- (1) Kulkul utawi gendongan ring desa Aan patut wenten dudonnia prasida tan tan baur ajeng lan suarannia, kadi ring sor :
 1. Kulkul Desa Adat Aan
 2. Kulkul Desa Pura ring sowang-sowang Pura Desa
 3. Kulkul Banjar ring sowang-sowang Banjar
 4. Kulkul Pekaseh ring sowang-sowang Pekaseh
 5. Kulkul sekehe Dadia
 6. Kulkul sekehe-sekehe tiosan
- (2) Suaraning kulkul inucap kaanggeh pinaka suaraning Desa utawi Banjar lan sekehe, satmaka atur utawi dedauhan mawit saking Krama mantuka ring krama sami
- (3) Tabuh tatepakan kulkul sowang-sowang inucap ring ajeng pastika manut ring tatujennia, tur manut ring pasubaya Krama

(4) Pemargi-pemargi sane patut macihna suara kulkul utawi sane patut nyuarayang kulkul, luire :

1. Pacang parum
2. Pacang tedun makarya ring desa utawi ngayah ring pura
3. Pacang ngampung
4. Pacang ngeretebin utawi mapitulung ring sang kalayuan
5. Pacang ngupesaksi warga sane ngarangkat
6. Pacang wali utawi ngaturang wali manut pengastawa Ida Sulinggih lan Pemangku
7. Tatkala kepanca baya

(5) Tabuh tatepakan kulkul ring Desa Aan saha cihnan ipun sane sampun kaubayaniu, sekadi munggah ring sor puniki :

1. Tengeran lumbrah :
 - a. Tengeran tedun ngayah ring pura, mekarya ring Desa / Banjar, pacang parum, ngarentebin ring sang kelayonan :
Kalih palet / kalih tuludan sedeng.
 - b. Cihna warga ngerangkat / ngerorod. (Kalih palet / kalih tuludan sada gancang. Kulkul kasuarayang inganan sampun wengi).
 - c. Pakerab wenten warga Desa Lampus, (tigang palet ping tigang tepakau)
2. Tengeran baya :
 - a. Jiwa baya, upami keamuk, kebaek, kaculik, kaplegandang, kamalingan, Yuda miwah sane lianan (Apalet/atuludan bulus panjang)
 - b. Baya tiosan upami : puwun, kablabar, anyud, linus, miwah sane lianan
 - c. Yan kawentenan baya inucap sampun maren utawi degdeg tur aman cihna ngararianang pitulung / perembayan krama (kulkul kasuarayang, apalet atuludan panjang tur lambat)

Kramane sami mapupul malih ring Banjar utawi genah siosan manut wiguna, pacang nyacak utawi miragiang pakerab

3. Tengeran wali ring Pura

Satununggil wali ring Pura, ngawit pengastawan Jro Mangku, utawi Ida Sang Sulinggih rawuh sapuputing pengastawane, kulkule ring Pura kaswaraang negteg/tegteg, utawi nyangsih / masangsihan manut kweh kulkule.

Pawos 25

- (1) Kulkul Desa utawi Banjar, patut kasuarayang utawi katepak olih Prajuru utawi sang kapituduh antuk I Prajuru manut tetujon
- (2) Yan sane sinalih tunggil Krama keni kepanca baya, wang inucap utawi krama siwosan sapituduhnya kayogya digelis nyuarayang utawi nepak sinalih tunggil kulkul Desa utawi Banjir sewengkon Desa Aan, tur patut supekta maka jalaran buat tatujon panepake.
- (3) Yan tan wenten sadu ring Banjar, maka jalaran panepake sang nepak patut keni pamidanda.

Palet 5

Indik Druwen Desa

Pawos 26

- (1) Sane keanggeh druwen Desa Aan, kadi ring sor :

Kahyangan Desa upami : Pura Dalem (Pura Dalem Agung, pura Dalem Klod, Pura Bale Agung, Pura Puseh, Pura Penataran Pura Bedugul / Ulunswi, Pura Pasiraman, Pura Tirta, Pura Dalem Subagan.
- (2) Setra wenten tigang palemahn, luire :
 1. Setra Kidul
 2. Setra Lor / Tunen
 3. Setra Babakan, sareng setra Sengkiding
- (3) Saluir tanah Desa lan bukti / pelaba pura
- (4) Tanah palinggih pura sahe talajakannia

- (5) Tanah linggih wewangunan druwe Desa, upami : Pasar wantilan /Balai Desa, Alun-alun, Tanah Kantor Perbekel (pecak linggih Pura Bale Agung) lan banjar saha telajakannia.
- (6) Tanah pekarangan Desa, karang embang saja telajakannia
- (7) Margi sajeroning wawidangan Desa Aan
- (8) Piranti-piranti druwe Desa utawi Banjar luire :
- (9) Pelanggaran mekadi tetabuhan lan ilen-ilen luire :
 1. Ilen-ilen wali ring Pura
 2. Gong angklung, Gambang
- (10) Pretima-pretima

Pawos 27

- (1) Sehanan sane kadruwe antuk Desa patut keraksa, kapiara, kepahayu antuk Krama Desa sami, maka pingajeng olih para Prajuru Desa lan Banjar
- (2) Prajuru Desa wenang ngetangan druwe Desa midabdab ungguhnia, wawidangannia, sopecarannia, kagunannia/wigunannia, utawi yening wenten druwe sane patut keanggen tatkala merebiyaning wewangunan Desa / Pura utawi keanggen pangaci / yadnya ring Desa.
- (3) Sehanan druwen Desa kaungguhan ring ilikita sane pasti antuk Prajuru seha sapari indik pamargi / panelasnia
- (4) Nyabran paruman Desa utawi Banjar druwen Desa utawi Banjar patut kakesiarang/kaserahang antuk Prajuru manut sane wenten ring ilikita.
- (5) Krama Desa sami wenang nitenin tur mastikayang druwen sami manut ilikita punika
- (6) Prade wenten druwen jagat / desa / Pura lan Banjar sane ical, sang sapesira sane memandang / memaling wenang keni danda saha ngewaliang barang inucap
 1. Yaning prade nenten wenten ngangken ngambil duwe punika patut / jagat /Desa / Pura lan Banjar keni Padewa saksian

2. Prade wenten krama nenten rauh sejawaning alangan patut matur uninga ring Prajuru soang-soang
3. Prade wenten sinalih tunggil krama Desa sane ngambil barang sane suci patut keni pemedanda lan pamerayascita

Palet 6

Sukerta Pamitegep

Kaping 1

Karang, Tegal lan carik

Pawos 28

- (1) Karang Desa saha telajakannia patut keangge tur keayahang olih sowang-sowang Krama Desa.
- (2) Gegaleng kaulon, kangin utawi kaja : Karang, tegal muang carik, wates sisih kangin muang kaler, patut kekaryanin olih sang nerebenang. Wates punika patut taler kapiara antuk sang nerebenang karang ring ulun ipun.
- (3) Yan wenten wates karasayang ngalikadin utawi runga, patut katepasih olih prajuru, yan pada arsa kangkat nganggo patok/pal saking Pemerintah / Agraria
- (4) Prade wenten karang utawi tegal, carik sane kabebeng patut kausahayang uak- uakan utawi margi.

Pawos 29

- (1) Sinalih tunggil krama Desa utawi krama Banjar tan kalugraha ngalah pahan tanah pekarangan, tegal, carik padrebean anak tiosan, punapi malih sane kadruwe antuk Desa utawi sane mabuat suci minakadi linggih Kahyangan, Setra, margi miwah sane siosan
- (2) Yan wenten krama malaksana kadi ring ajeng wenang katiwakin pamidanda, luirnia:
 1. Ngewaliang tanah sane kalahlah
 2. Pamidanda penguak swara ring desa

3. Yan sane kalahlah marupa genah sane suci krama inucap keni denda pangupakara
- (3) Nanggap lan matimbang karang ayahan Desa, mekadi ring sor :
1. Sahanan karang Desa sane sampun katanggap tur kaayahang antuk Krama Desa patut kegenahin antuk sang ngayahang
 2. Yan wenten karang tan wenten ngenahin, tan wenten nganggap tur tan wenten sane ngayahang patut kadruwe antuk Desa.
 3. Sahanan Krama yening polih nanggap karange, kramadinucap patut magenah netep ring karang inucap, mawaneng tigang sasih saking ngawit nanggép karang mangda sampun magenah tetep ring karang inucap.
 4. Yan jantos tigang sasih karang inucap taler tan kagenahin, wenang katimbang antuk I Prajuru ring sang mamidi siwosan
- (4) Yan wenten krama pacang usan ngayahang karang patut ngawaliang ring Prajuru Desa. I Prajuru manut parareman, prajuru wenang matimbang ring krama siwosan
- (5) Krama ngarep yening pacang matimbang karang, patut polih kabebasan antuk warisania tur polih pamutus saking Prajuru Desa.
- (6) Krama Desa tan patut ngadol karang ayahan Desa utawi nyandayang
- (7) Yan wenten krama, maweh krama pangele utawi penyada magenah ring karang ayahnia sangkan pada rene, kalugraha satmaka ring sametonnya, pemargi krama inucap tetap tan mawauwah
- (8) Krama sanunggal tan kayogia ngayahang karang Desa lintangan ring asiki
- (9) Yaning wenten krama numbas pepayonan ring pekarangan tur nimbal karangnyane patut keni ayah ngarep

Kaping 2

Pepayonan

Pawos 30

- (1) Matetanduran kekayonan, tanem tuwuh sane ageng, yogia adepa agung karang wates karang mangda tan ngarebrebin / mayanin ring tiwosan

- (2) Prade wenten tetanduran tanem tuuh sane ngarebrebin utawi kaanggeh pacang mayanin kapisaga wenang kawara, madasar paiguman sane becik mangda kakayonan punika digelis karebah utawi katebtebin
- (3) Yan us kawara/kawatra kadi ucaping akeng sane mrebeayang tan satinut utawi tan wenten usaha nagingin pangidih / pinunas sane ngawara, sang rumasa karebreban tur ajerih pacang kabayanin patut nyadokang ring Prajuru Desa utawi Klian Banjar
- (4) I Prajuru wenang maritajasa maweh panyepat pamutus arep ring sane nerebeang kekayonan inucap mangda digelis ngerebah kekayonan sane kawara Sang nundung utawi ngawara patut naur panebus urip utawi pangerok urip kekayonin inucap, mageng apah dasa saking pangargan taru inucap.
- (5) Prade wenten tanem tuwuh sane sampun keni kewara kapelungguhang, taler tan karebah, mawastu ngerebahin/ngarubuhin ring pekarangan / tegal utawi carik siwosan, sang nerebeayang patut kani pamidanda, luire :
 1. Nawur karugian utawi nawur prabeya ring sehanan sane karubuhin
 2. Keni danda pangaskara / pangupakara marep sane karubuhin. Ika ngaran danda tulah angerubuhin.
- (6) Sehanan tanem tuwuh sane ngarubuhin / mayanin wawangunan, sang nerebeang patut nawur karugian ring sang karubuhin

Kaping 3

Wewangian / wewangunan

Pawos 31

- (1) Sowang-sowang pacang mapawangun patut ngutsahayang mangda pewangunnyane tan keni ngalempasin tata kasukertane ring Desa, wang mapawangun patut :
 1. Masadok ring Prajuru Desa indik genah pawangunan saha tatujonia
 2. Manut gagulak / ngangge gagulak manut kacaping aji kosala-kosali miwas asta bumi, utamania manut patitis ring Desa
 3. Tan nganinin wates ngayubin / nyapcapin punapi malih jantos ngaliwat wates kapisaga

- (2) Prade wenten jantos sekadi ucap ring ajeng patut kawana tur kasadokang ring I Prajuru. I Prajuru maritatas, yan kabuktian jantos nganinin wates utawi nyapcapin ngaliwat wewangunan inucap, patut keni pamidanda manut pararem.
- (3) Wewangunan sane ngawinang ngarusak, ngotorin, ngempengin miwah sane ngaryanang pakobet penyandingnyane, upami : pabrik, kandang wewalungan utawi siwosan, patut atur supeksa dumun ring Prajuru mangda tan ngawinang pakibet ring penyandingnyane kapungkur.
- (4) Prade yen wenten wewangunan asapunika tur sampun kawara utawi kasadokang dawning ajerih ring pikobet sane jagi nibenin patut kawangdoang utawi ksautsahayang genah siwosan.

Kaping 4

Indik Wewalungan

Pawos

- (1) Sehanan warga Desa Aan kang mamiara wewalungan patut sayaga nitenin wewalungannia. Upami : negul, ngalogor mangda tan ngalogor mangda tan ngarusakin karang utawi pabianan Krama siwosan, bilih-bilih jantos ngaletihin Kahyangan
- (2) Prade wenten wewalungan melumbar utawi galak jantos ngerusakin pakarangan / pabianan. Risampune kaplungguhang / polih kewara, kengin ketaben tur kesadokang ring Prajuru. I Prajuru wenang mamidanda sang mrebeang manut perarem, tur kepatut keni kerugian nawur penebas asing-asing sane karusakang.
- (3) Prade ngeletihin genah suci, risampune kaparitatas olih Prajuru sang mrebeang patut keni pemitanda, tur sahe ngupakara kahyangan inucap manur purana.
- (4) Tan kawenang nganggonang, utawi negulang wewalungan ring genah-genah kadi ring sor :
 1. Talajakan Kahyangan Desa
 2. Margi-margi agung ring Desa
 3. Setra, alun-alun

4. Genah-genah rauhing pekarangan wewangunan Desa.

Kaping 5

Indik Bhaya lan Dusta

Pawos 33

- (1) Sehanan pelaksana sane tan rahayu sane mawesana ngawetuang pakobet, duhkita, duskerta ring wang utawi Krama Desa, sinanggah Bhaya. Wang utawi sang sane ngawinang bhaya sinanggah dusta
- (2) Sane sinanggah bhaya utawi panca bhaya upamin ipun :
 1. Jiwa bhaya : keamuk, kebaak, kepegandang, kaculik lsp
 2. Artha bhaya : kemalingan
 3. Geni bhaya : Puun, linus, belabor, anyud lsp
 4. Kaplegandang, kabegal, kaparikosa, lsp
 5. Duracara ring agama

Pawos 34

- (1) Sehanan warga Desa sane katiban bhaya yogia digelis atur supeksa ring Prajuru utawi sang wenang mewawosin
- (2) Sehanan warga Desa sane uning ring wenten jadma melaksana dusta/mayanin patut digelis atur supeksa ring Prajuru
- (3) Yan prade katiban ageng upami : Jiwa bhaya, artha bhaya, geni bhaya, kapelegadang, sang katiban bhaya utawi sang amangguh bhaya inucap wenang digelis nyuarayang kulkul tur atur supeksa ring Prajuru. Utawi kengin nunas pitulung ring Pemerintah Agung mekadi : Polisi, hansip lan pemadam kebakaran.
- (4) Sehanan warga Desa patut sayaga matetulung ngaromba sahe gegawan manut kawentenan bhaya punika. Tur patut ngeromba sang keni bhaya manut duhkitan nyane, antuk sih laksana, sih dana miwah siwosan mangda sang kaduhkitan prasida polih katulungan.

Pawos 35

- (1) Yan prade pacang maseserep utawi ngelodahin ritatkala kemalingan/artha bhaya, patut nunas panguak dumun ring Prajuru, Klian utawi Perbekel.
- (2) Maserep ring tios Banjaran utawi Desa patut polih panguak ring Prajuru utawi Klian Banjar inucap
- (3) I Prajuru patut nuntun mangda tingkah-tingkah maserep manut ring Awig-awig

Pawos 36

- (1) Sehanan wong melaksana dusta ngawinang bhaya, patut keni pamidanda ring Desa, katiba jampi ring sang kabayanin, nyangaskarta, manut kawenten baya inucap tur katur ring Pemerintah Agung
- (2) Yan prade mayanin ngerusak utawi ngemaling druwe sane sinanggih suci, patut pemitanda punika kawewehin panyangaskara caru utawi prayascita
- (3) Yan dusta sakeng dura Desa, yan keejuk patut ketaban, raris keaturang ring Pemerintah
- (4) Sang melaksana dura cara ring Agama prade kecihna manut ring tri premana, wang inucap keni danda panegeg aksara
- (5) Yan wenten watga Desa melaksana duskerti, saluir astacepala, wak cepala ring warga Desa siwosan patut keni pramidanda : Yan marep ring sang kapisenggeh / sinanggihang manut krama lan agama, wang inucap patut keni pamidanda pamrayascita marep ring sang dinuskerti
- (6) Yan ana wang nguman-uman, wakparusia, Wak cepala, kroda mayuadi ring pasangkepan ring pura wang inucap patut keni pamidanda.

Kaping 6

Pengunyaan Banjar

Pawos 37

- (1) I Krama Desa rikala ngawentenang karya suka duka, patut polih pengunyaan Banjar (karomba) antuk Krama Banjar utawi pengampok ring sowang-sawang Banjaran kadi munggah ring sor :

1. Rikala yadnya manut pinunas sang mayadnya
 2. Rikala ngewangun pitra yadnya, manusa yadnya anut pinunas meyadnya
 3. Banjar pengampok rikala mapitulung ring sang kaduhkitan / utawi ngewangun pitrayadnya, yan nista pesangune sasidan-sidan
 4. Pengias pengerombayan sangkaning pinunas sang mayadnya, mawates ping 3 (tiga) jantos puput yadnyane
- (2) Rikala wenten pekaryan Desa I Krama Banjar utawi pengampok mangda ngemargiang pangunyaan anut deresta, upami sane madruwe lelangan ngaturang tetangguran santukan rumasa pangukon Banjar maka tangansukuning I Desa.

SARGA IV

SUKERTAN TATA AGAMA

Palet 1

Pawos 38

- (1) Luir Pura-pura sane wenten ring Desa Aan :
1. Pura Kahyangan Desa : Pura Puseh, Pura Bale Agung, Pura Dalem Klod, Pura Dalem Agung, Pura Penataran / Gunung Kawi.
 2. Palinggih-palinggih siwosan : Pura Pekaseh / Subak Aan Dauh Desa lan Subak Aan Daging Desa, Pura Bedugul, Ulunsuwi, Masceti
 3. Pura-Pura Dadia
- (2) Rahina Piodalan ring Pura-pura kadi ring sor :
1. Ring Pura Puseh : Wrehaspati Umanis, Dungulan
 2. Ring Pura Dalem Klod : Anggar Kasih Perangbakat
 3. Ring Pura Dalem Agung : Anggar Kasih Medangsia
 4. Ring Pura Penataran : Anggar Kasih Julungwangi
- (3) Ring Pura-pura Dadia utawi ring penyiwian tiosan manut kadi pamarderesta Pangusabayan kalih pengaci-pengaci siwosan :
1. Ring Pura Dalem Klod, pengusaba ring Purnama Kawulu
 2. Ring Pura Penataran, pangusabane ring Purnama Kapat

3. Ring Pura Bale Agung, ngusabania ring Purnama Kedasa

Pengaci-ngaci puniki kemarginin olih Krama Desa Sami, kesarengin olih Subak
Aan Dauh Desa miwah Danging Desa

(4) Yadnya patirtaan / pengusabayan miwah pengaci-aci siwosan manut desa kala patra
: nista, madia, utama katuntun olih Ida Sang Sulinggih manut agama kalih perarem
Krama Desa

Pawos 39

Pengemong / Pangempon Pura, sekadi ring sor :

(1) Sehanan Pura Desa ring Desa Aan manggah mekadi ampenan Krama Desa Aan.

(2) Mawit saking pawilangan abot dangan pemargine kawentenang pahpahan
pengampon Pura mekadi ring sor :

1. Pangempon Pura Puseh : Saking Krama Banjar Selat, Banjar
Pempatan lan Banjar sla
2. Pangempon Pura Dakem Agung : Saking Krama Banjar Peken,
Banjar Griya lan Banjar Babakan
3. Pangempon Pura Dalem Klod : Saking Banjar Pasek, Banjar
Gingsir
4. Pangempon Pura Penataran / Gunung Kawi : Saking Banjar Swelagiri lan
Banjar Griya
5. Pangempon Pura Bale Agung : Saking krama Desa sami, saha
kesarengin olih Krama Subak /
Krama Carik Aan Dauh Desa lan
Dangin Desa

(3) Satununggal rahina patirtaan / piodalan, pangusabayan utawi yadnya siwosan ring
sowang-sowang Pura Desa inucap, kelaksanayang antuk Krama Desa pengampon
pura sowang-sowang, kapidabbadin utawi kaenter olih Prajuru Desa Pura ring
sowang-sowang Pura inucap. Pangastawane katuntun utawi kalaksanayang olih Jro

Mangku Desa Pura inucap saha keabih olih pemangku-pemangku Pura Desa siwosan, makadi olih Ida Pedanda manut Pemargine kadi deresta

- (4) Krama Desa sane siwosan, siwosan Krama Desa Pengempon Pura inucap patut pedek sami ngaturang bakti saha dulurania sayaga makta sekar, kewangen lan dupa
- (5) Ilen-Ilen waline sane patut keanggehang mekadi : akekidungan, rejang tandak aseseraman patut kajejerang manut deresta
- (6) Pahpahan pangempon Desa Pura inucap manut kawentenang Desa Kala Patra utawi kengin kauwah utawi kaatur malih

Pawos 40

- (1) Ring sowang-sowang Pura Desa kawentenang Pemangku Pura Desa, sane yogia pacang ngenterang/nuntun sehanan yadnya utawi pengastawan ring pura inucap
- (2) Sane patut kasudi dados pemangku :
 - 1. Mawiwit saking katurunan, oka utawi waris pemangku sane let
 - 2. Nunas wara nugraha pasewecan Ida Betara ring natar pura
 - 3. Yan prade memargi / panunase inucap ring ajeng tan prasida, patut kawentenang pamilihan / sasudian saking krama Desa sejagat
- (3) Nyudi Pemangku / ngalinggihang dados pemangku patut nganinin gaguat sane manut ring kecaping darma kapamangkuan tur tan ngalempasin kecap sastra lan agama
- (4) Sane tan kawenang dados pemangku, luire :
 - 1. Wang cedangga
 - 2. Sering anumpang laku
 - 3. Muang wang sane tan kararemin antuk Desa
- (5) Dudonan pacang dados Pamangku, luire :
 - 1. Keraremin antuk Krama Desa utawi madasar gilik sasudian Krama Desa
 - 2. Nunas wara nugraha ring Pura malarapan sesajen
 - 3. Mawinten / nyuciang raga kapuput antuk Ida Sulinggih / Ida Pedanda

- (6) Sang kasudi dados Pemangku Desa riwus puput pawintenannya, patut kapisinggih manut wigunannia tur ngamarginin seulah pemargi Pemangku Desa manut pamogannia.

Pawos 41

Swadarmaning Pemangku luire :

- (1) Aswaka darma astiti bakti ring Ida Batara sesuhunan utamania ring Ida Sang Hyang Widhi
- (2) Ngenterang, ngastawayang sehanan upakara / upacara ritatkala patirtaan utawi yadnya siwosan ring Pura
- (3) Ngastawang/ngokasang tatkala wenten krama pacang ngaturang punia, punagi, penawuran utawi nunas peneduhan ring Pura.
- (4) Ngelaksanayang sehanan sane mabuat suci ring Pura Kaluarga, nedunang utawi ngalinggihang Ida Bhatara utawi prelingga
- (5) Ngaturang aturan nangken prerainan Purnama Tilem
- (6) Nuntun Krama siwosan mangda setata astiti ring Widhi tur melaksana susila manut agama
- (7) Pemangku-pemangku Desa yogia nyiratin / nyiratang tirta ring Krama sane siwosan, sakawenten yan ring Krama sane kasinggihang patut sangkaning kaluarga antuk sang kasiratin
- (8) Pemangku-pemangku Dadia, Pawibon, kawenangania wantah ring Krama Dadiannya inucap kewannten, dawning Pemangku Dadi, kasudi tur kaanggen, kaupakara rauhing wesannia antuk Krama dadiannya inucap

Pawos 42

- (1) Ritatkala nganter yadnya utawi patirtaan ring Pura, Pemangku Pura ring desa inucap patut :
 1. Pinaka pangenter pengarep ring Pura
 2. Yogia polih pangerembin ring Pemangku-oemangku siwosan

3. Yogia niwakang pituduh ring mangku sanak / mangku siwosan lan marep ring Krama Desa siwosan
- (2) Yan prade Jro Mangku sane marep keni kepihalang jantos tan pradida ngemargiang upakara ring Pura, patut upacarane kemargiang ring pemangku Pura Desa sane tiwosan utawi yogia nawur Ida Sang Sulinggih
- (3) Yan ana Pemangku keni ujar ala, ulah ala, pemangku inucap patut kaperayacita, kasepuh olih Krama Desa. Sangmaweh ujar ala lan ulah kakenin pamidanda manut parareman.
- (4) Yan parade ana pemangku kabuktiang anumpang laku nyasar ring sesana, pemangku inucap tan wenang kasepuh tur patut kausanang dados pemangku, madasar paputusan perarem Krama Desa tur tan sah nunas pematut ring sang Sulinggih utawi sang sane patut mawosin

Pawos 43

- (1) Sahananing aturan-aturan / penawuran sesangi, aturan sesari, aturan arta, laluwesane, mule-mule sakeluire patut kadruwe ring Pura inucap.
- (2) Sehanan wang sane pacang maturan, mapanawuran sekadi ucap ring ajeng patut masadok ring prajuru ring Pura inucap
- (3) Sehanannia kadi ucaping ajeng wenang kangge ring Pura manut tetujon

Pawos 44

Patitis utawi ulih-ulihan Pemangku luire :

- (1) Kapisinggihan Krama manut linggih tur sesamannia
- (2) Polih pah-pahan sesari manut perarem
- (3) Polih patias siwosan saking aturan Krama manut perarem
- (4) Polih pahan pamupon saking bukti / pelaba Pura manut perarem
- (5) Laluputan pesen-pesen ayah muang pedagingan manut perarem
- (6) Kaupakara antuk Krama Desa, indik pawintenannyane, pamerayascitannyane / panyepuhannya

- (7) Kaupakara pitrayadnyannya riwekas antuk Desa tur pemargi Pitra Yadnyane
kelaksanayang ring patur sane ngewidangin

Pawos 45

Ngentosin Pemangku luire :

- (1) Ngentosin pemangku mawiwit sangkaning kadi ring sor :

1. Kalayuan / Jro Mangku seda
2. Pinunas saking Jro Mangku inucap
3. Jro Mangku kausanang melarapan sangkaning kanerayang / melaksana dusta

- (2) Prade Pemangku Kausanang melarapan sangkaning kanorayang utawi melarapan
saking melaksanakan asta dusta, pemangku inucap patut keni pemitanda
ngawaliang pawintenannia pecak manut pararem

- (3) Prade Jro Mangku muah angalap rabi sangkaning rahayu utawi tan sangkaning
dusta / pepaksaan patut I Pemangku nyapuhin raga tur katedia antuk I Prajuru Desa

- (4) Yan Jro Mangku Desa mapinunas wusan dados Pemangku sangkaning maparih-
perih, ngulati karya, nilar desa, kawenang riwus puput keni pemitanda pemitas
panglukar sesame manut pararem Desa.

Pawos 46

Kasukertan kahyangan kadi ring sor :

- (1) Sehanan Krama Desa lan Warga Desa sami patut nureksa nyaga mangka kasukertan
kalih kasucian Kahyangan Desane tan kaletihin

- (2) Sane tan Kalugraha ngeranjing ring sajeroning Pura :

1. Sang sebel ring raga : rajaswala, durung tutug akambuhan
2. Cuntaka mawit sangkaning kelampusan manut sengker
3. Jatma sane kapianggeh petita : panak babinjat, beling tan wenten ngangkenin /
tan kasinanggaskara, jatman buduh, sakit ila muah sekancan candela siwosan,
sadurung polih kaperayascita manut Agama
4. Sato ageng sejawaning mapepada

5. Mabunasa sane tan patut manut tata susila ngeranjing ring Pura
6. Sadurung polih uak-uakan / lelugrahan saking Prajuru
7. Maksa sehanan barang sane sinanggeh letuh manut Agama : saluiring barang mawit saking watangan, layuban pitra Yadnya
8. Sehanan sane tan kepatutang manut perarem cendala-cendala siwosan utawi sane kabawos ngeletehin

(3) Pretingkah laksana sane tan kawenang ring Pura :

1. Masumpah / nahap cor, sajawaning sangkan pituduh utawi kauwakang olih prajuru
2. Maujar ala, ulah ala, wakparusia, nemah / misuh
3. Mejaljal, mayuadi, punapi malih jantos metu rah, kabawos ngeletehin
4. Menahang wastra, menahang pusung muah sane siwosan
5. Makeratan / makebetan, anguyuh, makolem lanang istri masarengan dados asiki, masenengan atemu rasa, masanggama muwah sane siwosan

(4) Yan prade kabuktiang wenten jadma utawi Krama sane malksana sane kabawos ngaletihin kadi ucap ring ajeng wenang keni pamidanda manut perarem. Yan prade kabawos bange ngaletihin mekadi mayuadi metu rah, mesanggama, makta sehanan barang letuh. Kahyangan inucap patut kaperayascita sang melaksana keni pemitanda pamerayascita

(5) Yan kahyangan Desane keni kadurmanggalan mekadi kapanca kerubuhan, kahanan wangke, wangke sato ageng, I Pemangku patut suksma digelis nyadokang ring Prajuru mangka marumang Krama Desa pacang ngawentenang pangupakara sepatutnya

(6) Prade wenten jadma utawi Krama Desa karauhan ring Pura, patut digelis kapintonin manut perarem, makajalaran muktiang jati tan jatinnya wang kerauhan inucap, yan tan jati kerauhan patut keni pamidanda manut perarem

(7) Yan wenten wang/wong edan jantos ngerusak palinggih utawi siwosan ring Pura, wang inucap utawi kepatutannya patut mecikang sehanan sane rusak tur keni pamerayascita manut agama.

Palet 2

Indik Resi Yadnya

Pawos 47

(1) Sang pacang mapudgala/madwijati sadurungnya patut :

1. Polih panugrahan saking Parisada Hindu Dharma lan kantor Agama maka cihna sang pacang mapudgala inucap sampun putu ketitenin, ikatureksa indik sehanan kawentenan pawengannia tan ngalempasin kadi kecap ring sastra dresta, sulakseminnia, kawurahannia manut darma lan sesana sane pacang kemargiang
2. Taler patut wenten sadu ring prajuru desa

(2) Prajuru desa patut nitenin/nureksa mungguhing kawentenan anggalan laksana sang pacang mapudgala mangda jati-jati tan lepas utawi jati manut ring kecaping agama I Prajuru patut sareng nyaksinin pamargin upakarane, mangda manut sekadi kecap agama

(3) Yan prade wenten ngelempasin utawi nyasar tan manut sekadi kecaping agama, I prajuru wenang tan ngareremin

(4) Risampun patut upakarane tur nabin ida sampun mapaica parab, I Prajuru patut nyiarang indik parab lan pamargin Ida Sang wus putus maduwi jati

(5) Padiksa/pawintenan pemangku desa utawi pemangku siwosan kemargiang manut sekadi kecap ring ajeng

(6) Sang mawinten sane pacang mamargi : nyenteng, dalang, ngusadain sakeluire sane pacang ngenterang yadnya manut tatujonnia, patut masadok ring prajuru. I Prajuru wenang ngawas nitenin kawentenannia tur nyaksinin upakarannya. Selanturnnia prajuru nuarakang indik tetujon pamargin sang mawinten inucap rawuhing watos wawidangannyane.

(7) Prade nyasar tan manut kecap agama lan tetujonnia I Prajuru wenang ngandeg pawintenannyane

(8) Ida Sang Sulinggih sane keadegang pinaka Siwa (pinaka guru loka/pala sraya) antuk desa kepatut kadi ring sor :

- a. Upakara/upacara padiksan ida lan yadnya pratiwan ida riwekas kelaksanayang antuk desa
- b. Penaka panuntutn Krama desa ring indik tatwa etika Upacara Agama
- c. Muput yadnya lan upacara ring Kahyangan utawi yadnya lan upacara Krama Desa
- d. Pinaka Kerta Desa Patut matetiwak pamutus lan pangaskara, pamrayascita marep duskerti, manut putusaning Kerta Desa.
- e. Krama Desa Mingsinggih linggih ida tur patut ngaturang pengresibujana utawi punia
- f. Tan kapatut muput yadnyane sane kantun sajroning wicara

Pawos 48

- (1) Prajuru yogia nuntun Krama Desa mingsinggihang utawi mikukuhang linggih sang para Wiku, para pemangku lan sang sejana sami manut linggihnyane
- (2) Krama Desa patut ngaturang punia tatkala wus ngaturang karya pamuput yadnya
- (3) Krama patut teleb pisereng nunas pengayah sang Pandita utawi parasejana sane manut ring tata susila, agama kalih sehanan sane mawesana kasutreptian kerahayuan desa manut aji agama.
- (4) I Krama Desa sisian Ida Sang Sulinggih patut ngaturang punia tur muputang yadnya pretiwa ida riwekas

Pawos 49

- (1) Krama desa ketuntun olih Prajuru wenang nitenin seulah pemargin sang muput yadnya siwosan :
 1. Mangda sehanan yadnya sane kawentenang madudonan manut kecaping aji.
 2. Mangda tan nyasar laku, tan manut ring swedarma kalih sesanannia
- (2) Yan prade wenten ane tan manut punapi malih kabuktiang nyasar laku medasar tri premana (bukti, ilikita, saksi) sang pinandita utawi pemangku patut katunasang

pamutus ring nabenia utawi ring sang sane patut maweh penepas mangda kaicen
pamutus

- (3) Tatiwak sang nabe sane sampun kasangra/kakukuhang antuk sang mawangrat
(pemerintah utawi jawatan agama) sinanggeh pamutus sane pastika

Palet 3

Indik Pitra Yadnya

Pawos 50

- (1) Sehanan upakara pamereteka sang wuwus lampus kabawos pitra yadnya sekadi :
meresihin sawa, mendem, ngeseng sawa, atiwa-tiwa. Wus punika kelanturang antuk
upakara pangeroras, ngangkid utawi nuur rawuhing ngalinggihang ring parihyangan
Dewa Hyang Batara. Duluran upakarane nganutin kecap yama tatwa kalih purana,
kadulurin tirta pangentas saking paican Ida Sang Sulinggih
- (2) Mendem sawa, ngeseng utawi mendem sawa :
1. Yan sang lampus wus pupak / ketus untu patut nganutin padewasan
pangutangan sawa mekadi kecaping wariga manut dresta
 2. Saha nunas panugrahan ring Sang Sulinggih. Yan rare / anak alit durung pupak,
kaluarga mendem premangke tan nyantos dewasa
 3. Genah mendem ring setra ugi (setra bajang, setra ageng), ring setra kaler, setra
babakan setra klod
 4. Ida Sang Sulinggih wenang amilih linggih atiwa manut deresta

Pawos 51

- (1) Pamargi padewasan mendem utawi atitiwa taler kapidabbad nganutin paetangan
desa kala patra, upami yan katuju wenten yadnya ring jagate utawi ring desa, upami
kahyangan agung, karya ring pura
- (2) Yan prade sang kabukti tan/tan kalampusan kewentenannya kobet (dahat
kemewehan) kalugraha makingsan sawa ring setra premangke. Pemarginnyane

mendem mangda inganan sampun sore, tan nyuarang kulkul tan paukara, sasiliban / mangda nyilib, tur tan ngangge gegumuk.

Preteka pangupakara sang lampus inucap kalaksanayang ring panemaya padewasan pamensemannya manut panugrahan Ida Sang Sulinggih

Pawos 52

- (1) Sajroning nyantos padewasan mendem sawa utawi pangutangan, layone wenang kakekeb ring paumahannia tur patut polih pagebagan krama Banjar
- (2) Prade lampus sangkaning salah pati, ulah patim kapengawan utawi siwosan sakeluirnia, kengin kabakta budal pretekania wantah abebersihan tur kasanggra antuk banten pangulapan, banten penebusan, wus punika patut kakingsanang premangke. Riwus matuuh asasih pitung rahina wenang kapreteka kadi patut banten papendeman
- (3) Yan ana wong istri lampus ngadut manit tan wenang kapendem sedereng babotannia embas
- (4) Yan wenten krama madruwe warga keni gering agung / sakit ila, wenang kenang kasadokang tur sang rumaksa patut mepatiba jampiang antuk usada mangda sang gering mewali waras. Yan tan sapunika rikapabiannya wang agering inucap tan polih parembayan krama
- (5) Prade wenten padem ring carik, tegalan sang nrebayang kapatutan utawi waris patut keni pemerayascita lan pecaruan sealitnya amanca warna kelaksanayang ring genah inucap, mawaneng sedurung asasih pitung rahina
- (6) Prade wenten wang padem ring pekarangan, tegal, tepi, siring wawidangan Desa Aan. Tan keni elingin, sesampune kapituduh antuk pemerintah wang padem punika wenang kepandem ring setra kelaksanayang antuk desa utawi banjar sane ngawidangin. Upakara pamerayascita/paletehan desane kamargiang antuk desa.
- (7) Yan wenten krama utawi siwoan ngelingin utawi ngangkenin, wang inucap patut keni pangupakara paletehan inucap.

- (8) Prade yan wenten krama saking siwos desa pacang mendem utawi pacang matampung ngaben ring Desa Aan, patut keni penanjung batu panukan setra miwah kekenan siwosan manut perarem

Pawos 53

Parembayan krama tatkala kelayuan, makadi ring sor :

(1) Krama sane kaduhkitan/kepademan :

1. Krama sane kepademan patut digelis nyadokang ring Kelihan Banjar, aptine nunas patimbangan ring prajuru indik tatuton pamargine manut kawentenannya.
2. Nunas parembayan krama banjar / desa manut pamarginnyane
3. Ngaturin krama panyembrama sakewantennania

(2) Prajuru patut :

1. Maritetes tatujon pamargi sang kaduhkitan manut kawentenannia
2. Ngenterang utawi ngatur laksana parembayan krama banjar / desane
3. Nyuarayang kulkul manut dudonannia

(3) Krama oangerembat patut :

1. Nedunia patus manut sekadi sane kareremin manut pemarginnya
2. Krama kalih warga ngaremba sang kaduhkitan sepatutnya manut pamargi deresta
3. Ngemarginin patus manut pidabdab pamargi patus sane sampun keanutin ring perarem

(4) Rikala ngamargiang/nyandang sawa pacang mendem utawi nyandang wadah sakeluirnya saha upakarannia, pamargine kasetra mangda dabdab antar tan ulah laku. Mangda dabdab ateg-atehan upakarane, pamerenan, sawa, wadah patulangan lan sakeluiripun tan kengin karusak, tur sehanan pamargi upajara mawesana rahayu

Pawos 54

Yan kalaning wenten patitan/pangusabayan ring Pura Desa, sadurunge Ida Bhatara patut katuran wali/ patirtan tan kalugra mendem, asapunika taler tatkala pacang nyineb sadurung Ida Bhatara wus masineb tan kalugra mendem

Pawos 55

Mungguwing kacuntakan sekadi ring sor :

(1) Sang kacuntakan tan kengin rawuh / ngranjing kagenah utawi palinggih sane kapianggeh suci, punapi malih ring pura-pura Desa

(2) Luwire sang keanan cuntaka :

1. Raja swala
2. Wit madruwe /ngembas putra
3. Karuron
4. Kapademan
5. Nyambut karya Pitra Yadnya
6. Miwah cuntaka sane siwosan manut pamargi

(3) Lamin sengker cuntakane manut kawentenan jararannia kadi ring sor :

1. Raja swala, 3 (tigang) rahina ngawit saking ngraja swala
2. Ngembasang putra, 42 (petang dasa kalih) rahina ngawit saking putrane embas jantos sampun kaupakara makambuhan
3. Karuron, 42 (peteng dasa kalih) rahina kawit saking karuron
4. Kapendem, cuntakannia ngawit saking kapendem :
 - 1) Sebel bebanjaran, jantos tigang rahina wusnia mendem/pengutangan
 - 2) Sasebelan kepademan kulawargannia sane sajeroning pakarangan jantos solas rahina
 - 3) Yan kepadem yayah rena, katekeng anak, siwosan pekarangan jantos tigang rahina
 - 4) Yan anak kantun ngadut mala, sasebelan reramannia jantos petang dasa kalih rahina

- 5) Yan anak alit sampun kepus pungsed sadurung maketus, sesebelan
reramannia jantos pitulukur rahina
- 6) Sang sedeng nyambut karya Pitra yadnya cuntakannia ngawit saking nanceb
jantos pitung rahina riwus yadnyannia
- 7) Yan tatkala sedeng nyambut karya/yadnya ring Pura Desa, sane polih
pialang sebel wantah sang ngarepin, kalih pangapitnia kemawon

(4) Sane tan keneng cuntaka / sesebelan :

1. Ida Sang Sulinggih / Ida Pedanda
2. Para pemangku desa
3. Ida sang mawang rat / Ida I Dewa Agung

(5) Ida sang Sulinggih / Ida Pedanda lan Ida I Dewa Agung ritatkala pralinannia lan
pitrayadnyannia wenang kasebelang antuk jagat

Pawos 56

- (1) a. Sane patut keabenang : sehanan sawan sang sane sampun mayusa apupak
(maketus untu) tur sehanan saw2a sane tan kabawos letuh wenang keabenang
- b. Sang sadurung pupak kapatut ngalungah
sawan sang kabawos letuh wenang keabenang riwus puput sengkernia tur
kaprateka manut agama
- c. Sawan sang kabawos letuh wenang keabenang riwus puput sengkernia tur
kaprateka manut agama
- (2) Sinalih tunggil krama yan pacang atiwa-tiwa patut mangda ngamargiang patus
- (3) Tingkahe ngangge patus, wenang ngangge patus alit, patus madia, patus agung
- (4) Yan patetiwan masa sanistannia kamargiang patus madia.
- (5) Krama sanunggal kengin ngangge patus madia utawi patus ageng apisan amasa
- (6) Tatkala memargi patetiwan masa, yan wenten bebanjaran sane tan ngarepin karya /
atiwa-tiwa, krama patus banjar punika patut kealihang utawi kepah-pah patusnyane
kabakta ring banjaran sane ngarepin karya atiwa-tiwa tiwosan, sajeroning patus
madia utawi patus agung manut pemargi patus.

Pawos 57

(1) Ring Desa Aan wenten pah-pahan pamargi patus kadi ring sor :

1. Patus Desa / patus agung
2. Patus madia / patus panglimanan
3. Patus alit / patus abanjar alit

(2) Pemargine wenten kali soroh, luwire :

1. Patus masa pamargine tahunan
2. Patus dadakan / padgatakala

(3) Suwang-suwang krama kengin ngamargiang / nganggen patus masa utawi dadakan manut kawentenan dasa kala patra

(4) Yan patetiwan Ida Sulinggih utawi pemangku desa patut kamargiang patus masa

(5) Pamedal-medalan patus, kadi ring sor :

1. Yan patus masa : beras, ajengan, rerambuan
2. Yan patus dadakan : beras ring ajengan

Pawos 58

(1) Yan kalaning patetiwan masa, patus madia utawi patus mageng pemargi regane kadi ring sor :

1. Ngrabas : ngariyanin margi ke setra
2. Ngaryanin rompok
3. Ngaryanin pesanggrahan
4. Nangiang / ngebet sawa / tulang
5. Ngaryanin lan makta tatak api
6. Nyandang wadah lan eteh-ete upakara siwosan
7. Sajawaning inucap ring ajeng, manut paigunan lan pangenter prajuru

(2) Tataning memargi utawi nyandang wadah utawi siwosan, mangda manut tatujon upakara yadnya tur mawesana rahayu

(3) Dening setrane kekalih (baler desa lan delod desa) pemargine patut malegenti Pinih rihin kapatut sane ngalerang

Pawos 59

- (1) Yan wenten Krama sane ngabenang sawa saking tiwos desa utawi patempung saking desa siwosan, krama inucap patut sadurungnya patut nyadokang ring prajuru, tur nawur kenan-kenan kadi ring sor :
1. Pananjung batu
 2. Panukun setra
 3. Pangungkab lawing
- (2) Sehanan /saliwir atusan ring Pura Dalem mawit saking panukun setra, pananjung batu, pangungkab lawing, panebus atma, manggeh druwen desa tur kamanggehang ring ilikita
- (3) Prajuru-prajuru miwah pemangku ring Pura Dalem patut polih pah-pahan saking aturan inucap manut pararem

Palet 4

Indik Manusa Yadnya

Pawos 60

- (1) Manusa yadnya inggih punika, upacara / upakara darmaning manusa ngawit saking patemuning karma bang kalawen karma petak sajeroning garba wasaning ibu jantos lampus riwekas
- (2) Upakara / Upacara kadi ring ajeng, luwire :
1. Magedong-gedongan
 2. Tatkala rarene wawu embas
 3. Kepus odel / malepas awon
 4. Tutug kambuhan (42 rahina)
 5. Rare mayusa tigang sasih
 6. Rare mayusa enem sasih / awetuan
 7. Mapetik rambut
 8. Tutug kelih
 9. Mapandes

10. Mawiwaha

11. Mawinten / madwijati

(3) Upacara-upakara inucap ring ajeng nganutin kecap agama, nista, madiya, utama, nganutin dresta muang somecara ring Desa Aan

(4) Siwosing upacara / upakara inucap yan ana wang / krama manak buncing (kembar lanang istri) desane kabawos katangeb :

1. Tan kayogya ngaranjing / ngaturang wali upacara ring Pura Desa, dadiya utawi merajan sadurung kaprayascita ring rarene akambuhan (42 rahina). Perayascita lan pecaruan Desana kesanggra antuk Desa Pamerayascita lan pacaruan Desa ring paumahan rerane kelaksanayang antuk sang madrebe rerane.
2. Mungguwing agung alit pangambilan caru parayascitane ring Desa manut pararem, sanistane caru manca sanak tur kalukat / patut nunas panglukatan toya segara
3. Sajeroning katangeb / kesebelan, Krama Desa / Banjar sane siwosan patut maweh pangroba ring sang madrebe rare buncing.

Pawos 5

Indik Buta Yadnya

Pawos 61

(1) Bhuta yadnya inggih punika, sehanan upacara-upacara pabeakalan ring pretiwi lan kahyangan muwang sarwa bhuta kala

(2) Upacara-upacara pabeakala ring sarwa perami, luwire :

1. Sarwa tumuwuh, ring tumpek wariga
2. Sarwa perani / ingon-ingon ring tumpek uye

(3) Upacara-upakara pebeyakalan ring pretiwi miwah kahyangan lan sarwa bhuta kebawos mecaru, luwir ipun : soto, manca sato, manca sanak, pemalik sumpah, tawur kesange, yadnya sesa, ngejot kalaning wus ngerateng

(4) Sajawaning munggah ring ajeng, malih pabeyakalan marep ring manusa manut wiguna

(5) Malih tatkala tilem kesange kawentenang tawur kesanga.

Pawos 62

(1) Upacara tawur kesanga / ritatkala tilem kesanga, patut kalaksanayang kadi ring sor :

1. Ring pempatan Agung Desa Aan, kawentenang pecaruan jagat, agung alit pengambile nganutin Desa kala patra, sanistane amanca sato
2. Ring pempatan, patigaan siwosan utawi ring Banjar kaamong antuk Banjar manut pah-pahan amongan
3. Ring Pura-pura Desa olih Prajuru Desa, Pemangku
4. Ring Pura Dadia, sanggah lan paumahan kelaksanayang antuk soang-soang pengempon

(2) Nyoreang kawentenang pangrupukan mabuwu-buwu. Pangrupukane kapidabdab antuk Prajuru mangda tan jantos ngawinayang karusakan, utawi baya tur mangda tan langkungan ring atengan wengi

(3) Ring rahina panyepiane patut pamargiang berate penyepian / catur brata manut Agama, luwire :

1. Amati geni
2. Amati karya
3. Amati lampah
4. Amati lelanguan

(4) Pamargi bratane manut kawentenan Desa kala patra saha ketuntun olih Prajuru Desa utawi sang sane kasudi. Pangawit lan waneng ngemargiang brata patut macihna suwaran kulkul manut pararem

(5) Sang sane mamurung brata penyepian punika patut keni pemitanda manut para sowang Krama patut nunas pangaksama ring sasemetonannya, tur ngawit dewasa Saka Warsa

SARGA V

SUKERTA TATA PAWONGAN

Palet 1

Indik Pawiwahan

Pawos 63

- (1) Pawiwahan panunggalan purusa lan antuk predana laki-istri malarapan panunggalan suka cita kadulurin antuk upasaksi sekala lan niskala
- (2) Pidabdab pawiwahan ring Desa Aan, dawning Desa ngalajerang/ngemanggehang pamargi purusa, waris purusa/krama kapurusa, pawiwahan sane kapatut ring Desa, inggih punika sang kapurusa / wang laki sane kapatut ngalap rabi. Sang predana sane pacang kawiwahan patut kaparabiang / kapumahang ring sang kapurusa
- (3) Pamargi pawiwahan wenten palih-palihan ipun, luwire :
 1. Pepadikan/kamanggala antuk pakraman
 2. Ngerangkat/ngerorod, memargi rihin / sasiliban, wus punika wawu kakurenayang
 3. Nyeburin (sang lanang kapresintenayang kamargiang paperasan laju kawiwahan ring wadone)
- (4) Pidabdab sang pacang mawiwaha, luwire :
 1. Sang sampun munggah teruna deha
 2. Sangkaning pad arena / tan parikosa
 3. Yan prade ngambil siwos Agama patut kemanggala antuk banten penyambutan
 4. Nganutin kecaping Agama sajana jenyana
 5. Mangda nganutin daging-daging undang-undang pawiwahan sane kalajerang antuk Pemerintah
- (5) Yan tan manut sekadi kecaping ring ajeng, tan kasinanggeh syah, tur kapalasang, sang maurug patut keni pamidanda

Pawos 64

(1) Pawiwahan sane sampun puput kesahang ring Desa Aan :

1. Pemargi pawiwahan sampun nganutin pidabdab pawiwahan ring Desa Aan
2. Sampun mawidi widana sanistane pabiyakalan
3. Kesaksinin antuk prajuru, Pemerintah
4. Sampun munggah ring ilikita ring Desa utawi siwosan
5. Nawur prabeya upasaksi maserana antuk pajati

(2) Sane kabawos tan patut utawi kabawos tan syah, luwire :

1. Pepaksaan, tan pad arena
2. Durung tutug yusa
3. Tan paupasaksi
4. Tan pailikita / pinaka bukti
5. Miwah sane tan manut sekadi geguat pamargi pawiwahan sekadi kecap ring
ajeng

Pawos 65

Tata cara perabian ring Desa Aan, kadi ring sor :

(1) Sang pacang marabian, ngewarahang kulawarganyane, patut masadok ring Prajuru
indik pemargi pewargangane.

(2) Pemargi pepadikan madudonan sekadi ring sor :

1. Pakerman ping tiga luwire : pasekawan, pengambilan, pangunyanaan
2. Wus pengambilan laju natab pabiyakalan warga sang istri nyuwarayang kulkul
3. Pangayaan maduluran pejati katur ksanggah / merajan wadone

(3) Prade ngerangkat / ngerorod, sang sane ngerangkatang / ngambil anak istri patut
lumaksana sekadi ring sor :

1. Ngawentenang pasedek, pasedek sanistane kalih diri (siwosing ring ram arena
kalih semeton). Tan kasepan ring awengi, saha maserana suluh
2. Ngawentenang pangelukuan ping tiga manut tata cara, saha dulurannia
3. Daging pangelukuane :

- a. Nunas pengampura, geng rena marep ring warga wadone
 - b. Kaigumang antuk bawos idih pangidih saha mapanulus, ngarencana padewasan pabeyakalan lan pasakapannia.
4. Duluran pangelukuane, luwire : sedah, jambe, arak, lsp
- (4) Yan sampun pada tulus bebawosane tur sami anut, wargan sang wadon raris nyuarayang tatengeran kulkul maka cihna pemargi ngerangkate sampan ketrima
- (5) Yan jantos pang tiga panglukuane durung katrima, sang lanang patut nyedokang pemargin nyane ring I Prajuru utawi ring Pemerintyah Agunge.

Pawos 66

- (1) Sang kaicalan kulawargannia yogiya digelis atur supeksa / mesadok ring Prajuru tur kayogiya nunas pitulung pacang maseserep
- (2) I Prajuru patut ngenterang pemargine maseserep tur nuntun peseserepe mangda nganutin tata kartin Desane.
- (3) Paserepe patut sampun polih wak-wakan antuk Prajuru-prajuru ring genahe maseserep

Pawos 67

- (1) Manut pamargin dresta, sang lanang yogia marabi adiri, sajawaning wenten pasubaya, kawehin antuk rabiné ping rihin manut kawentenannia.
- (2) Yan wenten jadma istri mobot, patut digelis kasadokang / tur kasakapang ring sang mobotang. Prade sang mobotang tan manut, wang inucap keni pamidanda petang tali sangan wiji jinah bolong, saha kapatut ngupakara rarene riwekas
- (3) Prade tan wenten mariangken mabotang, sang mobot utawi kylawargannyane patut keni pangerebuan ring Bale Agung, tur patut ngupakara rarene manut Agama.
- (4) Prade wenten wang mamitra ngalang (ngeker anak istri), patut digelis mawiwaha. Yan tan mawiwaha, jadma inucap keni pemidanda asmara dudu, prade yan kapurug wang inucap keni pamidanda nikel utawi kedaut pipilnya ring Banjar.

- (5) Yan wang drati krama, predana krama lsp. Sane ngawinang cemer jagat, prade tan usan-usana melaksana kadi inucap patut keni pamidanda samara dudu lan selanturipun sekadi kecaping ajeng
- (6) Yan ngerangkat ngambil ngunggahang wangsa Agama, wadone patut kaupakara patiwangi, katodiya antuk Prajuru Desa. Wadone kapekatang wangsa lan wangsa. Wus punika wawu mabiyakala lsp.

Palet 2

Indik Nyapihan

Pawos 68

- (1) Sang wusan merabian, palas tan sida atut satinut alaki rabi, kabawos nyapihan. Yan wus meperabian sangkaning kepadaman kebawos balu
- (2) Sang ayat pacang. Sepatutnia patut atur supeksa ring sang rumawos, nunas pailikita, wastu tinas apadang indik pamargine nyapihan. Lantar I Prajuru nyaruakang ring Banjar utawi ring Desa saha sepatut pemarginnya, utawi masamsam ring Bale Agung.

Pawos 69

- (1) Sulus pacang palas meperabian wenten sangkaning :
1. Pada lila pacang nyapihan
 2. Sangkaning wicara utawi pretingkah sane siwosan sane ngawinang tan prasida adung maprabian
- (2) Yan prade palas saking pada tusta lola sang nyapihan kaputusan kadi ring sor
1. Nawur prabeya ring sang rumawos
 2. Polih pah-pahan pagunakayan
 3. Pabekelan mawali niri-niri
 4. Wewarisan kakuawasa antuk purusa
 5. Anak-anaknia kakuasa antuk purusa
 6. Patut nguwehin pangupajiwa lan kaweruhan ring sentana

(3) Jalaran nyapihan tan pada lila utawi wit sangkaning wicara, luwire :

1. Anasir laku, paridara, drati krama
2. Cedangga, tan prasida sanggana
3. Kapunggelan idep / rasa, utawi wandu
4. Wakparusia, wirosenglaku
5. Macecal, matilar tan pasadok, utawi tan maweh pangupajiwa langkungan ring nem sasih

(4) Prade kacihna tur kasadokang antuk sinalih tunggil manut sekadi jalarannia, parabian inucap wenang kapalasang. Sang sisip patut keni pamidanda manut pararem.

(5) Sang nyapihan keni pamidanda ring Desa, risampun katiwakin pamutus antuk sang rumawos manut jalarannia nyapihan sekadi ucap ring ajeng.

Pawos 70

(1) Yan riwekas sang pecak nyapihan malih adung tur mawiwaha patut ngalaksanayang pawiwahan malih manut pawos perabian ring ajeng

(2) Wang inucap keni pamidanda nikel saha patut kadulurin banten pamarayascita

Pawos 71

(1) Balu luh sane katinggal lampus antuk suaminya utawi balu sane pecak nyeburin, patut ngemargiang swadarma kadi ring sor :

1. Ngemanggehang kepatibratan, tan paridara, drati krama
2. Ngemargiang sehanan ayah krama
3. Ngeraksa, nguwasayang lan miara sehanan warisan lan pagunakayan kalih sentannnia
4. Tan kengin ngadol utawi makedihang warisan sejawaning polih kebebasan saking pakulawargan rabine saking kapurusa
5. Kengin ngidih sentana yan sampun mapidabdab sareng rabine pecak tur polih kebebasan saking kulawarga kapurusa

6. Kawenang malih mawiwaha yan sampun kepaigumin antuk oka deha teruna lan kulawarga kapurusa
- (2) Balu sane tan pageh ring swadarma luwire :
 1. Metingkah drati krama paridara 1sp
 2. Matilar tan pasadok jantos langkungan ring nem sasih
 3. Lempas ring swadarmaning balu /salah prewerti
 - (3) Balu sane tan pageh ring swadarma kadi ucaping ajeng, prade kacihna manut Tri Premana salah prewertinnia wenang katundung olih warha kapurusa saha tan polih pah-pahan waris
 - (4) Prade wenten balu tan pasentana utawi pasentana pageh ring swadarma, katundung olih wargannia kapurusa patut polih pah-pahan pagunakayannia

Palet 3

Indik Sentana

Pawos 72

- (1) Sentana wenten kalih pawos, sane kaucap pratisentana lan sentana kaperasan
- (2) Sentana sane metu saking pawiwahan, sane sampun marupa sah tur pupating saksi sekala lan niskala kabawos pratisentana
- (3) Yan sentana sane metu saking pawiwahan sane durung sah, utawi pawiwahan durung kapatut wadene sampun mebet, sentana inucap patut kaupakra manut agama, kepretisentana tur kesaksiang mangda tan kaucap letih
- (4) Prade saking pawiwahan tan presida ngawentenang sentana kengin ngadegang sentana / ngidih sentana. Kadulurin antuk upasaksi sekala kelawan niskala saha upakara paperasan kawastanin sentang maperasan.

Pawos 73

- (1) Ngadegang sentana manut dudoning patut maka cihna antuk arta brana pamerasan, saha kesaksiang antuk prajuru, warga lan waris tur kamenggahang ring ilikita antuk prajuru, tur kaupasaksi kapuputang yadnya pamerasania antuk ida sulinggih

- (2) Sang pacang ngadegang sentana patut masadok ring prajuru asasih sadurung panemaya pamerasannia, tur patut ngawentenang pesadu marep ring kulawarga warisnya
- (3) Bendesa adat utawi kewakilin olih klian Banjar patut ngerabang ring Krama sawidangannia indik rencana sang pacang meras sentana
- (4) Yan ana Krama tan ninutin / utawi kababatan mangda ngadakang bawos pengandeg ring I Prajuru masengker tigang uku sebanen panemaya pamesannya
- (5) Bendesa adat digelis mawosin, saha ngicen penuntun utawi panepas manut ring catur Dresta, muwah manut daging perarem Desa.
- (6) Prade pamargane pacang meras tan kapialang wawu kapatut pacang kelaksanayang
- (7) Prade wenten ngalangin, manut sulur kecaping ajeng, prajuru wenang ngandeg sang pacang meras. Saha wenang maweh panuntun mangda tan wenten patungkas ring sesamennyane

Pawos 74

- (1) Peperasan sane kapatur ring Desa Aan luwire :
 1. Sampun piput mawidi-widana
 2. Upacarannia kesaksinin olih prajuru adat lan dines
 3. Sampun manggeh ring ilikita
- (2) Sane kapatut keadegang sentana luwire :
 1. Krama megama Hindu
 2. Papernahan nedunang saking sang pacang meras
 3. Kulawarga saking kapurusa
 4. Prade tan wenten kulawarga saking purusa kengin saking wadu. Prade saking wadu tan wenten, wawu kengin manut sasudin sang pacang meras (tunggil paibon)
- (3) Meras sentana kengin langkungan ring adiri, lanang wiyadin wadon

Pawos 75

- (1) Swadarmaning sang meras sentana, pateh ring swadarmaning guru rupaka luwire :
1. Maweh pangupajiwa
 2. Ngupakara manut agama
 3. Maweh / ngutsahayang kaweruhanning sentana
 4. Ngupadi kerahajengan sentana manut patitis grehasta 1 sp.
- (2) Sang kasentanayang / sang keadegang sentana swedarmannia pateh ring swedarmaning sentana, setata ngupadi darmaning putra sesame
- (3) Yan sang kalih inucap ring ajeng sinalih tunggil kesadokang lempas ring sesame yogia kesadokang tur keni pamidanda manut perarem

Palet 4

Indik Wewarisan

Pawos 76

- (1) Sehananing tetamian arta brana, pusaka saha ayah-ayah ngupadi kesukertian sekala lan niskala saking kaluhurannia arep ring tuunannia kabawos warisan.
- (2) Kang sinanggeh warisan luwire :
1. Druwe tanah, druwe turun temurun saking kaluhuran : arta brana kahyangan, pusaka, siwekrama, tanah ayah-ayah miwah sane tiwosan
 2. Paguna kaya
 3. Utang piutang
- (3) Sane kabawos warisa, pawarisan inggih punika :
1. Sang kapiturun, kabawos pewaris
 2. Katurunannia, kabawos ahli waris
 3. Arta berana miwah tategenan kan ayah-ayah kebawos warisan

Pawos 77

- (1) Sane kengin manggeh ahli waris :
1. Kaping ajeng parati sentana purusa utawi sentana rajeg lan sentana paperasan

2. Prade tan wenten sekadi turunan purusa patut karerehin papemahan ngunggahang makadi rerama penah sasemetonan lan papernahan rerama misan mindon
3. Turunan kesamping mekadi misan mindon

(2) Swadarma ahli waris ring sor :

1. Ngamargiang / nyalidihi ayah-ayah waris
2. Ngusahayang utawi polih pah-pahan arta brana wewarisan
3. Ngarempon kahyangan merajan / pura tatinggalan warisan saha ngupakara
4. Ngelaksanayang sehanan pitra yadnya leluhur
5. Nawur / naggenin utang piutang pewaris antuk katinggalan pewaris utawi antuk guna kaya

Pawos 78

- (1) Wewarisan kengin kapah-pahsesamannia sang patut ngewarisin risampun swadarmaning ahli waris punika kapuputang mekadi, luwire :
 1. Muput pitra yadnya pewaris / leluhur
 2. Nawurin utang piutang
 3. Nyelidihi sehanan ayah-ayahania
- (2) Pah-pahan warisan patut mangda pada arep ring sinalih tunggil waris manut tingkataannia lan dudonannia
- (3) Yan tatinggalan guna kaya pah-pahannia taler kengin nganutin pasubayan pawaris sedawegnia hurip utawi nganutin surat wasiat
- (4) Sentana rajeg / wadon polih pah-pahan atengah saking pahan sentana purusa
- (5) Sane tan patut polih pah-pahan :
 1. Alpaka guru rupaka
 2. Nilar agama, lan sesanan kawitan
 3. Sentana rajeg kesah mawiwaha, kaperas kadegang sentana antuk siwosan lan sang nyeburin, ika ngaran ninggal kedaton

4. Sang lumaksana sekadi ucaping ajeng patut ngewaliang pah-pahan warisan sane pecak katerima
- (6) Sane kapatut tan polih pah-pahan sakewanten patut polih mauponin pah-pahan warisan sekadi ring sor :
1. Sang mulih deha, mulih taruna, riantukan duk pawiwahannya kaucap ninggal kedaton
 2. Balu luh sane pecak kawiwaha antuk sentana paperasan
 3. Balu muani nyeburin
 4. Sentana luh prade logika sanggraha tan kesah mawiwaha mawastu mapianak. Sentanannia kengin wantah ngewaris pagunakayan biyange.
- (7) Pewaris kengin tur kapatut mapaweweh duk kari hurip, arep ring ahli waris :
1. Paweweh jiwa dana, utawi pabekel tadtadan ring I pianak sane pesah mawiwaha
 2. Paweweh padgatakala
 3. Paweweh pedun pamongan / reraksan warisan padgatkala arep ring ahli waris

Pawos 79

- (1) Prade yan sajeroning pakula warga wenten ahli waris lintangan ring adiri, sesamen ahli waris punika patut kawentenang pah-pahan. Tingkahe pacang ngedum waris manut kadi ring sor :
1. Ngawentenang paigum indik pedum waris
 2. Yan tan sida ingum patut nunas tatimbang Kreta Desa (prajuru-prajuru desa)
 3. Yan tan malihing kade keapti tan cumpu ring panepas kreta desa, wawu raris nunasang ring sane rumawas ngawentenang wicara.
- (2) Yan ana pacang nunas patimbangan ring kreta desa. Prajuru-prajuru desa patut nureksa sila-sila manut ilikita, tur niwakang penepas sane kapatutang kadi ring sor :
1. Pertama ring ahli waris purusa
 2. Waris papernahan ngunggahang
 3. Waris papernahan kesamping
 4. Prade tan wenten kade ucaping ajeng kengin katiwakang ring katurunan wadon

5. Prade tan ana ring wang sekama-kama (tunggal pedadian)
- (3) Prade yan ana jantos ngepah tegal carik utawi karang ayahan desa, soang-soang ahli waris inucap patut katedunang ngamarginin ayahan krama desa marep

SARGA VI

WICARA LAN PAMIDANDA

Palet 1

Indik Wicara

Pawos 80

- (1) Sane wenang mawosin utawi mutusang wicara ring Desa Aan inggih punika sang kapianggeh kerta desa, putusanin prajuru-prajuru desa
- (2) Putusan panepase nganutin awig-awig desa patitis lan pamikukuh desa
- (3) Prade wicarane tan prasida meliang pamutus ring desa, sang mawicara kengin nunas ring sang rumawos utawi ring pemerintah agenge.

Pawos 81

- (1) Sehanan wicara sane mawiwit saking laksana corah, baya, nungkas awig-awig sane mawesana areh areng jagat utawi desa patut digelis kebawosin antuk prajuru-prajuru desa
- (2) Sejaba wicara kadi ring ajeng patut nyantosang pesadok saking sang nunas bawos
- (3) Panepase patut pastika :
1. Pastika nyantenang iwang patut melarapan tri premana
 2. Tan maren pepek / nganinin ring indik catur dresta (sastra, purwa, loka muang desa dresta)

Palet 2

Indik Pamidanda

Pawos 82

- (1) Desa utawi banjar wenang niwakang pamidanda ring warga sane sisip

(2) Patiwak / matetiwak pamidanda kelaksanayang olih bendesa utawi prajuru desa

(3) Bacakan pamidanda luwire :

1. Ayah-ayah panukun kasisipan
2. Danda arta (dadosan saha pankel-panikelnia, utawi panikel paturunan)
3. Pangupakara, pangaskara
4. Rerampagan
5. Kedaut tanah ayahan desa
6. Lan pamidanda siwosan

(4) Geng alit pamidandane sane katiwakang masorsinggih manut kaiwangan utawi sisipnia manut putusing pararem

(5) Sehanan jinah utawi raja brana saking pamidanda kapianggeh druwe desa

Pawos 83

(1) Yan wenten krama sane langkung ring tigang paruman amandel tan nawur para turunan utawi dedosan saha panikelannia, wenang karampag

(2) Tata cara ngelaksanayang rerampagan, manut kadi ring sor :

1. Kadulurin antuk pesadok saking prajuru arep ring sang pacang kerampag
2. Pemargi ngerampah kelaksanayang olih prajuru kesarengin olih krama seakehnya 5 (limang) diri pinaka saksi lan pengramba I Prajuru
3. Sang ngarampag mangda sangkaning darsana ngambil barang rerampagan utawi nyawenin tanem tuwuh seakehnia manut ring utang sane karampag
4. Rerampagane kemunggahang ring ilikita tur kesaksiang
5. Prajuru miteketin sang kerampag mangda digelis nebus sadurung waneng siya rahina
6. Lelangan punika keanggen nuku utangnya ring banjar utawi kawewehin antuk prabea rampagan. Sisannya kawaliang ring sang parampag

(3) Tata kapatutang / tan kawenang ngarampag barang-barang sane kalinggihang utawi sane maha bobot suci manut agama. Taler tan kawenang ngarampag barang sane ngawinang mademang pangupajiwa sane karampag.

- (4) Yan sane karampag ngalangin pemargi rerampagane inucap, wang inucap macihna tan nganutin awig-awig desa adat lan patitis desa. Lepas ring swadarmaning kra,a wang inucap wenang kedawut pipilnia ring banjar utawi ring desa, saha kedawut karang lan ayahannia, antuk krama desa. Wang inucap kabawos nora tur tan polih pengayom krama desa.
- (5) Pamidanda sisip kadi kecaping ajeng parida purna buntas tinas apadang, yan sang sisip sampun :
1. Nunas geng pengampura ring krama desa riantuk purun nguak pasubaya (pasuwara ring perarem)
 2. Nawur pamidanda penguak suwara, nawur pamidanda geng arta duk pacang karampag, tur mapeweweh malih apah desa manut sisihan lamine mahutang rerampagan kadi ucaping ring ajeng. Tur wang inucap mewali katerima sekadi krama desa.

SARGA VII

NGUWAH KALIH NGUWAHIN AWIG-AWIG

Pawos 84

- (1) Nguwah kalih nguwhin awig-awig puniki patut kelaksanayang antuk paruman krama
- (2) Paruman inucap patut kadasarin antuk gilik sadurung paiguman utawi perareman krama desa
- (3) Paputusan babawosan prasida yan sampun Kramane gilik sadulur utawi kengin majalaran pasuara (wawilahan suara).
- (4) Yan madasar wawilahan suwara gaguatnya kadi ring sor :
 1. Krama desane sane parum sanistane kalih pahan saking sane tan rawuh
 2. Suwara / wawilahan suwara sane nganutin sanistania kalih pahan saking wawilahan suwara sane sareng parun utawi memilih

Pawos 85

- (1) Perencanaan perareman indik pacang nguweh uwehin awig-awig kadi ring ajeng kengin kamedalang antuk I Bendesa. Kelian banjar Patas utawi saking krama niri-niri, utawi sinarengan.

SARGA VIII

PAMUPUT

Pawos 86

- (1) Awig-awig puniki kawastanin : AWIG-AWIG DESA AAN
- (2) Awig-awig puniki kamargiang ngawit saking keraremin antuk krama desa Aan.
- (3) Awig-awig desa Aan puniki manggeh tur kalaksanayang ring sajeroning wawidangan desa Aan, sekadi kecap ring pawos 1 ring ajeng.
- (4) Awig-awig desa Aan puniki nganinin sehanan warga lan krama desa Aan lan sehanan sang kakuwub antuk Krama Desa Aan

Pawos 87

- (1) Sakaluwiring pamargi sane wenten sadurungnia patut kaanutang ring sadaging awig-awig puniki
- (2) Sakaluwiring pemargi pakraman sane durung kebawos utawi durung munggah sajeroning awig-awig puniki mabggeh kalaksanayang manut tata cara sane sampun ketah memargi kadulurin antuk pepareman / paruman desa.

Pawos 88

1. Awig-awig puniki keraremin duk peparuman Krama Desa Aan, ring rahina Weraspati Wage Medangkungan, pang/ping 13, sasih ke 10, Icaha Warsa 1903, tanggal masehi 19 Maret 1981, magenah ring jaba pura Bale Agung Desa Aan.
2. Awig-awig puniki kalingga tangenin olih : bendesa adat Aan, Penyarikan Adat Aaan saha kesaksinin olih Prebekel Desa Aan.
3. Luwir sang ngalingga tanganin awig-awig Desa Aan puniki munggah sekadi ring sor :

Prajuru Desa Adat Aan :

1. Bendesa Adat Aan

2. Penyarikan Adat Aan

Anak Agung Gde Ngurah Adnyana

Anak Agung Gde Sayang Ardika

Perbekel Desa Aan

I Wayan Mastra

PAWEWEH LAN PAKELING

Om Swasti Astu

Sekadi sane sampun ketah memargi saking riyinging aryin, satunggil Desa pakraman ring Bali, kapidabdab antuk awig-awig desa adat sane marupa pasuara-pasuara, pinaka patitis lan mamikukuh nyujur kasutreptining desa krama. Sakewanten ketahan awig-awig desa adat punika tan marupa ilikita utawi awig-awig desa adat sane kasurat ring ilikita.

Sapunika taler sehanan pamargi-pamargi adat istiadat kalih daging awig-awig tata kerta sane mamargi ring Desa Aan tan wenten sane marupa awig-awig desa adat sane kasurat ring ilikita.

Nganutin pikarsdan Pemerintah angege sane ngawengku jagate ring Bali duk tahun Masehi 1980/1981 sehanan awig-awig desa adate ring Bali mangda taler katulis marupa awig-awig desa adat sane kasurat ring ilikita

Mawit saking punika, taler sangkaning paswecan Ida Sang Hyang Prama Kawi, ring desa Aan puniki ngawitin saking Isaka 1903 sampun prasida wenten awig-awig desa adat Aan, sane sampun kasuratang marupa ilikita / lepiohan sekadi ring ajeng

Awig-awig puniki karipta tur kapupulang mawit saking pemargin kalih pasuara-pasuara sane sampun ketah memargi saking riyin nganutin purwa dresta, tur taler tan sah setata keanutang ring pamikukuh pemerintah agenge ring Negara Indonesia minakasi Pancasila, Undang-Undang Dasar 1945, kalih undang-undang sane siwosan.

Awig-awig puniki karipta antuk team penulisan utawi juru pangrencana awig-awig desa Adat Aan, ketuntun kalih kasanggara oleh Team Penulisan Lembaga Adat kalih Pelaksana Pembina Lembaga Adat Kecamatan Banjarangkan, Pelaksana Pembina Adat Kabupaten Klungkung, minakasi Majelis Pembina Lembaga Adat Propinsi Bali.

Aan, 19 Maret 1981

Team Penulis Lembaga Adat Desa Aan